

Վերջ չկայ քմահաճ գալարներին: Շոգենաւի պտուտակի ամեն դարձին տեսարանը փոխուում է: Դէմ եկող ամեն մի հրահանգան բերում է իր հետ եւ մի նոր անակընկալ:

Երբեմն նաւակները մի ամբողջ շարք է, որ խմբել է մանրիկ խորշում ձկնորսի խրճիթի տակ, երբեմն մի գերեզմանոց, որ սարն ի վեր է մագլցում կամ ճգնաւորի լուիկ խուցը, որ գաղտուկ ցած է նայում անտառակի թագուն անկիւնից:

Թէեւ օրը շատ վաղ էր դեռ, բայց մեր շոգենաւի ամբողջ բնակչութիւնը դուրս էր թափուել տախտակամածը, որ զմայլէ առատօրէն մեր դէմ բացուող տեսարանով ու այդ սար ու ծովի իրար գրկող գոյներով, որոնք աւելի էին գեղեցկացել «ծագող արեւի» ճառագայթների տակ:

Մի առանձին պարզութիւն, փափկութիւն ու իգիլիկ անդորրութիւն է բուրում այդ ո՛չ-բարձր կենսուրախ սարերից, այդ օրօրուն մեղմ ծովից եւ երկնքի ջինջ կապոյտից:

Ո՛չ մի խիստ բեկուող գիծ չի խանգարում նկարի փափուկ ներդաշնակութիւնը, չի գրգռում դիտողի երեւակայութիւնն ու ջիղերը:

Ամեն ինչ կարծես ձգտում էր ճամփորդին էլ ներշնչելու մի խաղաղ ու զւարթ տրամադրութիւն՝ այդ ժպտուն, կանաչ աշխարհը մտնելիս:

Կեանքը հետզհետէ զարթնում էր ծոցում: Զօնկերը ծալաւոր առագաստները բացած սլանում էին մեր մօտից ու շտապում բաց ծոցը ձկան որսի:

Ճապոնական երկճեղ վերջով նաւակները ճօճելով լող էին տալիս ամեն ուղղութեամբ: Ծովի կապոյտի վրա որոշակի գծագրում էր դեկավարի բնորոշ կերպարանքը, որը կանգնած